



«Nus sentin la medema musica»

La sopranista Judit Scherrer Kleber da Trun è mamma e chantadura ord persvasiun.

7



Art da different gener

Instrument da musica da pli baud, maletgs cun colurs d'iel e sculpturas da lain mussa Siegfried Amadiüs Jud a Mustér.

7

DIE SÜDOSTSCHWEIZ

LA QUOTIDIANA

Redacziun: Via centrala 4, 7130 Ilanz/Glion, tel. 081 920 07 10, fax 081 920 07 15

Scola: Perfecziunament è chausa communal

■ (anr/hh) La regenza è da l'opiniun che la finanziaziun e reglamentaziun dal perfecziunament da las scolastas e dals scolasts duaia restar vinavant chausa da las vischnancas. Ils motivs persunter èn fitg differents. Ina concepziun generala davart dal chantun pretendess probablmain ina cunfinanziaziun davart dal chantun vi dals custs correspun-

dents da las vischnancas. En sia risposta ad ina incumbensa da la fracziun socialdemocrata dal cussegl grond accentuescha la regenza er ch'ils basegns locals e regiunals per in perfecziunament sco er per la salarisaziun sajan fitg differents. Per quest motiv saja ina reglamentaziun chantunala difficila.

> PAGINA 2

La lenna survegn nova calamita

Ils prezis da lenna creschan puspei era en vesta alla realisaziun dalla resgia a Domat

DA MARTIN CABALZAR

■ Las lavurs vid la resgia industrial a Domat progredesch tenor plan. Actualmein ei l'interpresa Stallinger lundervi da cumprar lenna sinaquei che quella seigi pinada e furnida sin che la resgia vegn messa en funcziun la primavera proxima.

Tenor il niev schef digl Uffeci cantunal d'uaul Reto Hefti ei la resgia industrial a Domat ina gronda schanza per l'economia forestala dil Grischun. Ella porchi numnadamein la pusseivladad d'elaborar la gronda part dalla lenna indigena el Grischun. Grazia alla damonda carschenta silla fiera da lenna seigi ei pusseivel d'intensivar ils tagls e da contonscher in meglier recav ord igl uaul. Ils fatgs ch'ils prezis da lenna creschan puspei dapi onns da stagnaziun seigi in clar indezi che la lenna seigi tschercada, di Reto Hefti. El ei digl avis ch'il grond potenzial uauls grischuns seigi vegnius nezegiaus ils davos onns mo a mesas. Cun nezegiar els pli intensiv sappien ins era migliurar



Primavera 2007 vesa ei era ora a Domat sco alla sedia principala da Stallinger a Frankenmarkt sper Salzburg.

FOTO N. PITARO

la cultivaziun e tgira aschia ch'els adempleschien aunc meglier lur funcziun da schurmetg. La pli gronda sfida dil forestaleser gri-

schun vegni uss ad esser da saver furnir alla nova resgia lenna en quantum abundant e sils termins fixai. Per quei intent ha il cantun

creau 5 regiuns da coordinaziun, ina da quellas ei la Surselva.

> PAGINA 3

Forum Surselva: Surselva amiez l'Europa

■ (mc) Cun quest tetel empau provocativ van il promotur d'economia Pieder Vincenz e la Giuvna combra d'economia Surselva ell'offensiva tematisond il svilup economic futur dalla regiun. Sco magnet per quei emprem arranschament dil Forum Surselva che ha liug vendergis ella halla da helicopters a Tavanasa eis ei reussiu d'engaschar igl anteriur minister d'economia Josef Deiss sco

referent. Denton era igl iniziativa interpretider indigen Simon Jacomet ed il delegau da Stallinger Swiss Timber SA Hennig Wacker ed il cosmonaut e banchier Werner Schäppi ein dalla partida. Cun quei arranschament vegli ins demonstrar als interpretiders indigens l'«impurtonza dil patertgar global ed agir local», puntuescha il promotur regiunal d'economia Pieder Vincenz enviers LQ.

Duas giadas gea da la ps

■ (anr/grc) Mardi passà ha la Partida socialdemocrata decidi duas giadas la parola gea davart da las votaziuns dal pievel dals 26 da november 2006, e quai unanimamain. D'ina vart sa tracti da la lescha per l'agid a l'ost cun ina milliarda francs entaifer 10 onns, da l'autra vart da la lescha federala davart supplements per famiglias che duessan vegnir augmentads sin minimalmain 200 francs per uffant enfin 16 onns e sin 250 francs per giuvenils en scolaziun

da 16 enfin 25 onns. Christof Dietler, president da la ps dal circul dals Tschintg Vitgs, Michael Kern, il directur da la firma Würth International AG, Leo Mayer, expert per la collavuraziun cun l'ost e represchentant d'ovras d'agid, ed il cusseglier nazional da la ps, Andrea Hämmerle, han discutà davart quests temas ed han er dà pled e fatg a las dumondas dals preschents.

> PAGINA 2

Dapli programs e qualidad

La Reit da cabel Surselva ei preparada per las sfidas digl avegnir

DA GIUSEP VENZIN

■ Swisscom annunzia cun letras grossas la nova purschida da Bluewin. La Reit da cabel Surselva (KnS) sto far quei pil pli cun discuors persunals. Tuttina ha KnS la medema purschida sco ils distribuiders gronds. Vitier porchia KnS aunc biebein 15 piazzas da lavur da qualidad. «Nus

essan preparai per la sfida digl avegnir», di il meinafatschenta Peter Caviezel senza retenientscha. Quellas sfidas ein l'individualisaziun e la qualidad HDTV. L'individualisaziun porchia KnS gia ussa culla televisiun digitala e cun 40 films novs per meins. «Nossa purschida stat buc anavos alla purschida da Bluewin e nus essan adina vidlunder d'introdu-

cir enzatgei niev.» KnS ha colligiou las vischnancas grondas culla reit da cabel, uss ein las vischnancas alla periferia vidlunder. La colligiou dalla vischnanca da Sursaiassa ha retard, pigl onn 2007 seigi ella strusch realisabla. La Reit da cabel Surselva ei in project da svilup.

> PAGINA 4

Premis da cultura dal Grischun

■ (mc) Venderdi proxim surdat la regenza grischuna a persunas ch'èn sa fatgas meritavlas per la cultura premis da renconuschientscha e promozion. Tranter quels era plirs Rumantschs. Il premi cultural va quest onn a l'artist e scriptur ladin Jacques Guidon. Premis da renonuschientscha retschaiavan: Giosch Albrecht, Britta Allgöwer, Liliana Brosi, Armin Caduff, Adolf Collenberg, Gian Primo Falappi ed Eckart Fritz-Schocher. Cun in ulteriur premi vul la regenza promover l'activitad culturala da la generaziun giuvna cun surdar premis da promozion a: Remo Albert Alig, Pascal Bergamin, Jacinta Candinas, Maria Victoria Haas, Riccardo Lunati, Werner Nigg, Alexandra Peterelli, Ingrid Schütz e Seraina Maria Sievi. La Quotidiana purtretescha en libra successiun ils undrads d'origin rumantsch. Oz dain nus l'entschatta cun Adolf Collenberg che la regenza undra per ses merets sco perscrutader perseverant da l'istorgia grischuna e per ses vast engaschament cultural.

> PAGINA 3

Sesavel «Di da las figlias»

■ (anr/fh) Pella sesavla jada ha lö hoz il «Di da las figlias». Millis da mattas in tuot la Svizra as partecpeschan a quist proget interchantunal. Il «Di da las figlias» es gnü lantschà sco program da motivaziun per mattas. Hoz han las mattas da la tschinchavla

fin setavla classa occasiun da survgnir ün'invista i'l muond da la professiun. I nu's tratta d'ün di d'insai tradiziunal. Las mattas accumpognan a lur baps o mammas durant la lavur chi nu sto esser ün manster chi tillas interessa. Eir la sesavla classa da Scuol piglia part al di da las figlias federal. Tenor la magistra Marianna Schmied es impustüt l'ocasiun da dar ün sguard in ün manster dad homens üna sporta attractiva.



Peter Caviezel da KnS demonstrescha il teleguide dalla purschida da televisiun digitala.

FOTO G. VENZIN

Servetsch d'abunents e da distribuziun: tel. 0844 226 226



> PAGINA 9